



# РУХАНИ ЖАҢҒЫРУ – ЕЛДІ ДАМУҒА БАСТАЙТЫН САРА ЖОЛ

**Е**лбасы Нұрсұлтан Әбішұлы Назарбаевтың «Болашаққа бағдар: рухани жаңғыру» бағдарламалық мақаласы – ел дамуының жарқын үлгісі мен нақты қадамдарын көрсететін келелі ой, салиқалы пікір, батыл шешімдерге құрылған маңызды құжат. Бұл мақалада сананы жаңғырту, ұлттық болмыстан, ұлттық кодтан айырылып қалмай, оны әлемдік құндылықтармен үйлестіріп, Қазақстанның игілігіне жарату жолындағы мақсат-мүдделер туралы өзекті мәселе көтерілген.

Онда Тұңғыш Президент Қазақстан үшін қайта түлеудің айрықша маңызды екі үдерісі – саяси реформа мен экономикалық жаңғыруды қолға ала отырып, біртұтас ұлт болу үшін болашаққа қалай қадам жасалатынын және бұқаралық сананы қалай өзгерту жөнінде алысты болжайтын көзқарастарымен бөліседі.

Ұлт Көшбасшысы аталмыш жаңғырудың негізгі қызметі мен ерекшеліктеріне ой жүгіртіп, бұл жаңғырудың маңыздылығына тоқталып «Жаңғыру атаулы бұрынғыдай тарихи тәжірибе мен ұлттық дәстүрлерге шекеден қарамауға тиіс. Керісінше, замана сыйынан сүрінбей өткен озық дәстүрлерді табысты жаңғырудың маңызды алғышарттарына айналдыра білу қажет. Егер жаңғыру елдің ұлттық-рухани тамырынан нәр ала алмаса, ол адасуға бастайды. Сонымен бірге, рухани жаңғыру ұлттық сананың түрлі полюстерін қиыннан қиыстырып, жарастыра алатын күдіретімен маңызды» дейді.

Н.Назарбаев бұл ретте, тұтас қоғамның және әрбір қазақстандықтың санасын жаңғыртудың бірнеше бағытына жеке-жеке тоқталады. «Сананы жаңғыртудың» мазмұнын негіздей отырып, Елбасы жаңғырудың алты бағытын белгілейді.

Аталмыш бағыттардың бәрі барынша өзекті және қазіргі уақыт талаптарына нақты жауап береді. «Мәңгілік ел» болуымыз үшін бізге ауадай қажетті қасиеттер мен құндылықтардың қайнары тоғысып, ақыл-парасаты толысқан, ғаламдық ғылымды игерген адамдар көп болса, еліміз өркениетті, бәсекеге қабілетті болатыны ақиқат.

М.Әуезов атындағы Оңтүстік Қазақстан университетінің техникалық мамандықтар үшін жоғары математика және физика кафедрасының профессор-оқытушылар құрамы мен студенттер Елбасының осы ойларын басшылыққа алып, еліміздің рухани тұрғыдан дамып, интеллек-

туалдық дәрежесінің жоғарылауына үлесін қосады деген сенімдеміз. Тәуелсіз еліміздің болашағы – жастарымыздың интеллектуалды көрсеткіштері олардың тек білім деңгейімен ғана емес, сонымен бірге олардың ұлттық тәрбиесімен, тұлға ретінде рухани толысуымен де тікелей байланысты. Ұлттық кодтың өзегін сақтай отырып, болашаққа қадам басуымыз қажет. Білім – рухани жаңғырудың басты алғышарты. Өйткені, ой жүйесі терең, алыстан пайымдап, тереңнен толғайтын адам ғана бәсекеге қабілетті бола алады. Ендеше, рухани жаңару арқылы табысты ел болуға ұмтылу баршамыздың қастерлі борышымыз болуға тиіс.

**Науат ӨТЕНОВ,  
М.Әуезов атындағы  
Оңтүстік Қазақстан  
университетінің  
техникалық  
мамандықтар үшін  
жоғары математика  
және физика  
кафедрасының  
меңгерушісі.**